

आकाशवाणी जयपुर-अजमेर
प्रादेशिक समाचार
दिनांक 12.09.2024 समय :18.45 बजे

- रक्षा मंत्री राजनाथ सिंह जोधपुर मांय तरंग शक्ति युद्धाभ्यास निरख्यो- कह्यो-भारत रक्षा हलका मांय खुद रे पाण ऊबो व्हेवण सागे करीब 90 देशां ने हिफाजत ऊं जुड्या साज-ओ- सामान बेच रह्यो हैं
- राज्य रा ऊगणी हलकां मांय केई ठौड़ां जोरदार बारिश-धौलपुर जिला रा गोगली गांव मांय मकान ढस जावण ऊं दो टाबरां री मौत-केई बंधा ऊं बत्तो पाणी निकाळ्यो जा रह्यो हैं
- उपराष्ट्रपति जगदीप धनखड़ काल प्रदेश रा दौरा सारू पधारेलां
- पचपदरा मांय एचपीसीएल राजस्थान रिफाइनरी परियोजना हलका मांय करीब 81 फीसदी काम पूरो व्ह्यो

000

रक्षा मंत्री राजनाथ सिंह कह्यो है के देश वायु सेना अर रक्षा हलका मांय तेजी ऊं खुद रे पाण ऊबो व्हे रह्यो हैं वे आज जोधपुर मांय वायुसेना रा 'तरंग शक्ति' युद्धाभ्यास रे दौरान राख्यी ज्या हवाई करतब रा कार्यक्रम पाछे बोल रह्या हां रक्षा मंत्री कह्यो के लाइट कॉम्बेट एयरक्राफ्ट ऊं ले र भांत-भांत री तकनीक अर साज-ओ-सामान अब देश मांय ही बणाया जा रह्या हैं राजनाथ सिंह कह्यो के भारत रक्षा हलका मांय न केवल खुद रे पाण ऊंबो व्हे रह्यो है बल्कि करीब 90 देशां ने हिफाजत ऊं जुड्या साज-ओ-सामान मुहैया करा रह्यो हैं

.....

वे कह्यो के ऐडा युद्ध अभ्यास मित्र देशां बीचे आपसी मदद अर तालमेल ने बधावो देवे है अर ओ भरोसो ई व्हे है के जरूरी व्हेवण परां वे एक-दूजा सागे ऊबा व्हेलां रक्षा मंत्री कह्यो के सीखता रेहवण री प्रवृत्ति ऊं मानव सभ्यता रो ई विकास व्हे हैं ऐडा हालात मांय मददगार देशां ऊं सीख लेवणो घणो जरूरी हैं वे कह्यो के रक्षा हलका मांय तकनीक घणी तेजी ऊं बदल रही है, ई कारण मिलजुल र सीखणो वक्त री मांग हैं रक्षा मंत्री री मौजूदगी मांय राख्यी ज्या एयर शो मांय वायु सेना रा जहाज वां रा बूता अर ताकत रो दरसाव कीनों

000

राज्य रा ऊगणी हलकां मांय भारी बारिश रे कारण जिदंगी माथे घणो असर पड्यो हैं लारला 24 घंटां मांय राजाखोड़ा, धौलपुर, सवाईमाधोपुर, अकलेरा अर मनिया मांय घणी जोरदार बिरखा व्हीं ई रे अलावा 30 कस्बां अर शहरां मांय जोरदार मेह बरस्यो धौलपुर जिला मांय लगातार बारिश रे कारण सैपड उपखण्ड रा गोगली गांव मांय एक मकान ढस जावण ऊं दब र दो बच्चां री मौत व्हे गयीं हादसा मांय चार जणा जखमी व्हे ग्या, ज्यां ने धौलपुर रा अस्पताल मांय भर्ती करायी ज्या हैं जिला मांय चम्बल नदी मांय पाणी रो लेवल लगातार बध रह्यो हैं पार्वती नदी मांय ई लगातार आ रह्या पाणी रे कारण ई माथे बण्या बंधा रा 16 दरुजा खोल र बत्तो पाणी निकाळ्यो जा रह्यो हैं जिला मांय धौलपुर-बाड़ी गेलो बंद व्हे गयो हैं करौली जिला मांय पांचना बंधा ऊं ई बत्तो पाणी छोड्यो जा रह्यो हैं

भरतपुर मांय लगातार व्हे रही बिरखा ऊं केई गेला बंद व्हे ग्यां म्हाणा खबरनवीस बतायो के जिला रा बंध बारेटा रा पांच दरुजा खोल र बत्तो निकाळ्यो जा रह्यो हैं

.....

सवाईमाधोपुर जिला मांय मिश्र दर्रा कने चट्टानां पड़ जावण अर सड़कां टूट जावण रे कारण त्रिनैत्र गणेश मिंदर जावण वाळो गेलो बंद व्हे ग्यो हैं झालावाड़ जिला मांय आज संवारे ऊं ई रुक-रुक र बरसात व्हे रही हैं पूरा जिला अर पड़ौसी राज्य मध्यप्रदेश मांय व्हे रही बिरखा रे कारण जिला री न्यारी-न्यारी नदियां मांय पाणी बह रह्यो है, ज्यीं कारण भीमसागर, छापी, चवली अर दूजा बंधा अर तळाबा माथे पाणी री चादर चाल रही हैं तेज बरसात, पाणी भरण अर मौसम विभाग कानी ऊं जोरदार बिरखा सारू चेतायां पाछे केई जिलां मांय स्कूली विद्यार्थियां सारू छुट्टी रो ऐलाण कर दियो ज्यो हैं मौसम विभाग रे मुजब मध्यप्रदेश रा ऊपर बण्यो कम दबाव रो हलको आज दक्षिण-पश्चिमी उत्तर प्रदेश रा ऊपर पूग ग्यो है, जिण रे आवता 24 घंटा मांय उत्तर दिशा मांय आगे बधबा रा आसार हैं इण रा असर ऊं आवता चौबीस घंटां मांय भरतपुर, जयपुर अर कोटा संभाग मांय कठे-कठे भारी अर घणी भारी बिरखा रा आसार हैं मौसम विभाग रा जयपुर केन्द्र रा निदेशक राधेश्याम शर्मा बतायो के अजमेर अर उदयपुर संभाग मांय ई केई ठौड़ां बिरखा रा आसार हैं

.....

राष्ट्रीय पोषण माह रा तैत न्यारा-न्यारा कार्यक्रम राख र प्रदेश हाल तांई आठवीं ठोड़ माथे चाल रह्यो हैं महिला अर बाल विकास विभाग रा शासन सचिव महेन्द्र सोनी आज जयपुर मांय वीडियो कांफ्रेन्सिंग रे मार्फत जिला उपनिदेशकां अर सीडीपीओ सागे "राष्ट्रीय पोषण माह-2024" री समीक्षा बैठक मांय आ जाणकारी दीनीं सोनी जयपुर, जोधपुर अर उदयपुर समेत मोटा जिलां ने बेहतर काम करण रा हुकम दीनां लिस्ट मांय आखिरी पांच नम्बर वाळा बांसवाड़ा, टोंक, बाड़मेर, करौली अर नागौर जिला ने ई और बेहतर काम करण बाबत कही ज्यो

आईसीडीएस रा निदेशक ओ पी बुनकर बतायो के प्रदेश मांय ओ अभियान जनता रो आंदोलन बण ग्यो है अर ई रा तैत काम करण मांय चूरू अक्वल, अजमेर दूजी अर हनुमानगढ़ तीजी ठोड़ माथे हैं वे बतायो के महिलावां अर बच्चां रो बेहतर स्वास्थ्य अर पोषण तय करण सारू चलायी ज्या ई अभियान मांय खून री कमी, शरीर री बधोतरी माथे निगरानी, पूरक आहार, पोषण भी पढ़ाई भी बेहतर शासन के लिए तकनीकी उपाय, पर्यावरण संरक्षण थीम्स हैं

000

उपराष्ट्रपति जगदीप धनखड़ रो वां री जोड़ायत डॉ. सुदेश धनखड़ सागे काल अजमेर, खरनाल अर सुरसुरा रो दौरा करण रो कार्यक्रम हैं वां रो अजमेर कने किशनगढ़ रा राजस्थान केंद्रीय विश्वविद्यालय मांय राख्या जावण वाळा विकसित भारत /2047 में उच्च शिक्षा की भूमिका कार्यक्रम मांय खास पावणा रा तौर ऊं विद्यार्थियां अर शिक्षकां सागे बातचीत करण अर तेजा दशमी रे मौके अजमेर जिला रा सुरसुरा अर नागौर जिला रा खरनाल मांय वीर तेजाजी रा मिन्दरां मांय दर्शन रो कार्यक्रम हैं

00000

बालोतरा जिला रा पचपदरा मांय एचपीसीएल राजस्थान रिफाइनरी री 10 प्रोसेस इकाइयां रो 90 फीसदी ऊं बत्तो काम पूरो व्हे ग्यो है जदके परियोजना हलका मांय करीब 81 फीसदी काम व्हे ग्यो हैं खान अर पेट्रोलियम विभाग रा प्रमुख शासन सचिव टी रविकान्त आज रिफाइनरी परियोजना रा कामकाज रो जायजो लेवण सारू अहलकारां सागे व्ही मीटिंग मांय आ जाणकारी दीनीं वे बतायो के राजस्थान रिफाइनरी सह पेट्रोकेमिकल कॉम्प्लेक्स ऊं पेट्रोल अर डीजल सागे ई पॉली प्रोपेलीन, ब्यूटाडीन, एल.एल.डी.पी.ई., एच.डी.पी.ई., बेंजीन अर टोलूइन उत्पादन रा हलका मांय निवेश आवेलां

0000

किसान आयोग रा अध्यक्ष सी आर चौधरी आज सलूमबर मांय राख्यी ज्या किसान सम्मेलन मांय शिरकत कीनीं ई मौके वे कह्यो के राज्य सरकार जनता रा भला री न्यारी-न्यारी योजनावां रे मार्फत किसानां ने फायदो देवण री सगळी कोशिशं कर रही हैं

000

डीग जिला मांय जैविक खेती ने बधावो देवण बाबत 75 वर्मी कम्पोस्ट इकाइयां खोली जावेलां अतिरिक्त कृषि निदेशक देशराज सिंह आ जाणकारी दीनीं वे बतायो के योजना रा तैत किसानां ने खर्चा रो 50 फीसदी या 50 हजार रूप्या ताई री सब्सिडी दी जावेलां करीब एक एकड़ जमीन राखण वाळा काश्तकार करीबी ई-मित्र केंद्र माथे जा र या राज किसान पोर्टल माथे ऑनलाइन तरीका ऊं अर्जी दे सके हैं इण रो मकसद रासायनिक खाद रे कारण बंजर व्हे रही जमीं ने बचावणो अर मिट्टी री उपज बधावण री ताकत मांय बधोतरी रे जरिये किसानां री आमदनी मांय बधोतरी करणो हैं

000

पर्यटन मंत्रालय री ओर ऊं "देखो अपना देश"—पीपल्स च्वाइस 2024 अभियान चलायो जा रह्यो हैं ई रा तैत देश मांय सैर-सपाटा री नामी ठौड़ां रा बारा मांय जनता ने जाणकारी देवण अर आं ठौड़ां माथे विश्व स्तर रा सुबीता मुहैया करावण रा मकसद ऊं जनता ऊं राय मांगी जा रही हैं ई सारू माय जीओवी प्लेटफॉर्म माथे राय दी जा सके हैं ध्यानजोग है के ई साल सात मार्च ऊं ओ अभियान चलायो जा रह्यो हैं

00000

पेरिस पैरालंपिक मांय सिरकत कर र पाछा आया भारत रा खिलाड़ी आज नई दिल्ली मांय प्रधानमंत्री नरेन्द्र मोदी सागे मुलाकात कीनीं ई दफा भारत रा एथलीट टोकियो रा प्रदर्शन ने पाछे छोड़ता थकां पेरिस पैरालंपिक मांय देश सारू हाल ताई रा सब ऊं बत्ता सोना रा 7, चांदी रा 9 अर कांसा रा 13 तमगा जीत र इतिहास बणा दीनीं कुल 29 तमगां सागे भारत पदक तालिका मांय 18वीं ठौड़ हासिल कीनीं

000

जैसलमेर जिला रा रामदेवरा मांय चाल रह्या बाबा रामदेव रा भादवा मेळा मांय मोटी तादाद मांय जातरू पूग रह्या हैं 14 सितम्बर ताई चालण वाळा ई मेळा मांय आवण वाळा जातरूआं रा सुबीता सारू चिकित्सा विभाग 10 स्वास्थ्य चौकियां बणायी हैं सूचना अर प्रसारण मंत्रालय रा केंद्रीय संचार ब्यूरो रा जोधपुर क्षेत्रीय कार्यालय री ओर ऊं ई न्यारा-न्यारा कार्यक्रमं रे जरिये केंद्र सरकार री योजनावां रो प्रचार-प्रसार कर्यो जा रह्यो हैं

नीमकाथाना मांय तेजा दशमी रे मौके काल शोभायात्रा निकाली जावेलां नागौर जिला रा खरनाल मांय ई आज तेजाजी रो मेळो सरू व्ह्यो दो दिन रा ई मेळा मांय काल उपराष्ट्रपति जगदीप धनखड़ रो ई सिरकत करण रो कार्यक्रम हैं राज्यपाल हरिभाऊ बागडे रामदेव जयन्ती अर तेजा दशमी रे मौके बधाई अर शुभकामनावां दीनीं हैं

वे रामदेव जी अर तेजाजी कानी ऊं बतायी ज्या गेला ने अपना र दीन-दुखियां री सेवा अर प्राणी मात्र रा प्रति दया भाव ऊं काम करण बाबत क्ह्यो मुख्यमंत्री भजनलाल शर्मा ई रामदेव जयन्ती अर तेजा दशमी रे मौके जनता ने शुभकामनावां दीनीं हैं वे जनता ऊं बाबा रामदेव अर वीर तेजाजी रा आदर्श अपनावण री अपील कीनीं ई बीचे चूरू जिला रा झारिया मांय भादवी नवमी रे मौके लागण वाळो गोगा पीर रो मेळो भर रह्यो हैं मेळा मांय 40 ऊं बत्ता गांवां ऊं जातरू पूग्यां

00000